

佛說浴像功德經

唐天竺三藏法師寶思惟 譯



南無本師釋迦牟尼佛


說明

本繁體校正版《佛說浴像功德經》電子書，根據《乾隆大藏經》大乘五大部外重譯經，第 0289 部，唐天竺三藏法師寶思惟譯《佛說浴像功德經》影印本校正，句讀僅供參考。

本電子書是免費結緣品，特此說明。

仁慧草堂

二〇一九年二月



掃碼關注仁慧草堂微信公眾號

●起誦儀

香讚

(一編)

爐香乍爇. 法界蒙薰. 諸佛海會悉遙聞. 隨處結
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

淨口業真言

(三編)

唵. 修唎. 修唎. 摩訶修唎. 修修唎. 薩婆訶.

淨三業真言

(三編)

唵. 娑嚩. 娑嚩秫馱. 娑嚩達摩娑嚩. 娑嚩秫度憾.

安土地真言

(三編)

南無三滿多. 母馱喃. 唵. 度嚕度嚕. 地尾. 娑婆訶

普供養真言

(三編)

唵. 誡誡曩. 三婆嚩. 禡日囉斛.

南無本師釋迦牟尼佛（合掌三稱）

開經偈

（一編）

無上甚深微妙法 百千萬劫難遭遇
我今見聞得受持 願解如來真實義

佛說浴像功德經

唐天竺三藏法師寶思惟 譯¹

如是我聞：

一時，薄伽梵在王舍城鷲峯山中，與大苾芻眾及與無量諸大菩薩摩訶薩俱。

爾時，會中有一菩薩，名清淨慧，作是思惟：「以何因緣諸佛如來得清淨身？」又復念言：「若佛在世親近供養，及滅度後供養舍利，此二種人所獲福德功德齊不？」作是念已，承佛威神，從座而起，頂禮佛足，白言：「世尊！諸佛如來以何因緣得清淨身？若佛在世親近供養，及滅度後供養舍利，此二種人所獲福德其功德²等不？」

爾時，世尊告清淨慧菩薩言：「善哉！善哉！汝今乃能為未來世諸眾生故，發如是問。汝當善聽，我今為汝分別解說。」

爾時，清淨慧菩薩白佛言：「唯然。世尊！願樂欲聞。」

佛告清淨慧菩薩言：「諸佛如來為求菩提，

¹ 大正藏：大唐天竺三藏寶思惟譯

² 大正藏：功；永樂北藏及龍藏：功德

於往昔時所修三昧、戒、定、忍辱、智慧、慈、悲、喜、捨、解脫、解脫知見、力、無所畏、一切佛法、一切種智，悉皆清淨，是故，如來得清淨身。又以華香幡蓋而以供養，復以香水浴如來身，復以寶蓋彌覆其上，以諸飲食、鼓樂、弦歌、讚詠如來，以此功德迴向一切種智，所得功德無量無邊，乃至得成無上菩提。何以故？如來智慧無量無邊不可思議，所有功德³亦復如是！

「清淨智慧⁴，我滅度後有二種舍利：一者，法身；二者，化身。若善男子，善女人等，供養舍利，造佛形像如大麥等，造塔如菴羅果，表刹如針，蓋如浮萍，持佛舍利如芥子大安置其中，所得功德，如我在世等無差別。

「如是之人得十五種功德：一者，得清淨⁵念心。二者，得順法心。三者，得慚愧心。四者，得見如來。五者，發淨信心。六者，能持正法。七者，如說修行。八者，得親近諸佛。九者，諸佛國土隨意受生。十者，若生人中生大姓家，其心柔軟人所敬重。十一者，纔生人中得念佛心。十二者，諸魔軍眾不能惱亂。十三者，於末法時

³ 大正藏：福德；永樂北藏及龍藏：功德

⁴ 大正藏：慧；永樂北藏及龍藏：智慧

⁵ 大正藏：淨；永樂北藏及龍藏：清淨

能護正法。十四者，常得十方諸佛如來恒加覆護。十五者，速得成就五分法身。」

爾時，世尊而說頌曰：

若以清淨心	於如來滅後
供養舍利者	或造於塔廟
及如來形像	於彼塔像前
掃塗曼荼羅 ⁶	以種種華香
散布於其上	以諸妙香水
而浴於佛像	上妙諸飲食
淨持以供養	讚禮佛功德
無量難思議	智慧及神通
諸善巧方便	悉皆到彼岸

爾時，清淨慧菩薩聞佛世尊說是頌已，而白佛言：「世尊！若佛在世及滅度後，未來世中，諸眾生等，云何浴像？惟⁷願如來為眾生故，開示演說。」

佛言：「清淨慧，如佛在世，諸眾生等發起淨心，於佛滅後亦應如是，不作執空有想，於諸善品心懷渴仰，不生疲厭，何以故？為成就如來法、報身故。我已曾為汝說四真諦法、十二因緣、

⁶ 大正藏：漫陀羅；永樂北藏及龍藏：曼荼羅

⁷ 大正藏：唯；永樂北藏及龍藏：惟

六波羅蜜，我今為汝說浴像法，諸供養中最為殊勝。

「善男子，若欲沐像，應以牛頭栴檀、紫檀、多摩羅香、甘松、芎藭、白檀、鬱金、龍腦、沈香、麝香、丁香，以如是等種種妙香，隨所得者，以為湯水，置淨器中，先作方壇，敷妙床座，於上置佛，以諸香水次第浴之，用諸香水周遍訖已，復以淨水於上淋洗。其浴像者，各取少許洗像之水，置自頭上，燒種種香以為供養。

「初於像上下水之時，應誦以偈：

我今灌沐諸如來 淨智功德莊嚴聚
五濁眾生令離垢 願證如來淨法身

「燒香之時當誦斯偈：

戒定慧解知見香 遍十方刹常芬馥
願此香烟亦如是 迴作自他五種身

爾時，世尊說是法已，眾中有無量菩薩摩訶薩獲得清淨無垢三昧⁸；無量天人得不退轉無上菩提。

爾時，阿難即從座而起，白佛言⁹：「世尊！當何名此經？我等云何奉持？」

⁸ 大正藏：三昧，即從座而起；永樂北藏及龍藏：三昧

⁹ 大正藏：阿難白佛言；永樂北藏及龍藏：阿難即從座而起，白佛言

佛言：「此經名為『洗浴諸佛得身清淨』，應如是持。」

說是經已，一切眾會皆大歡喜，信受奉行。

佛說浴像功德經

● 結誦儀

補闕真言

(三編)

南無喝囉怛那. 哆囉夜耶. 佉囉佉囉. 俱住俱住.
摩囉摩囉. 虎囉. 吽. 賀賀. 蘇怛那. 吽. 潑抹拏. 娑
婆訶.

補闕圓滿真言

(三編)

唵. 呼嚧呼嚧. 社曳穆契. 莎訶

普回向真言

(三編)

唵. 娑麼囉. 娑麼囉. 弭麼曩. 薩嚩訶. 摩訶斫迦囉
嚩吽

南無佛 南無法 南無僧 (合掌三稱)

南無本師釋迦牟尼佛 (合掌三稱)

南無觀自在菩薩摩訶薩 (合掌三稱)

南無護法諸天菩薩 (合掌三稱)

禮佛發願文

(一編)

歸命十方調御師 演揚清淨微妙法
三乘四果解脫僧 願賜慈悲哀攝受

但(某甲)自違真性，枉入迷流。隨生死以飄沉，逐色聲而貪染。十纏十使，積成有漏之因；六根六塵，妄作無邊之罪。迷淪苦海，深溺邪途。著我耽人，舉枉措直。累生業障，一切愆尤。仰三寶以慈悲，瀝一心而懺悔。

所願能仁拯拔，善友提攜。出煩惱之深源，到菩提之彼岸。此世福基命位，各願昌隆；來生智種靈苗，同希增秀。生逢中國，長遇明師。正信出家，童真入道。六根通利，三業純和。不染世緣，常修梵行。執持禁戒，塵業不侵。嚴護威儀，蝸飛無損。不逢八難，不缺四緣。般若智以現前，菩提心而不退。修習正法，了悟大乘。開六度之行門，越三祇之劫海。建法幢於處處，破疑網於重重。降伏眾魔，紹隆三寶。承事十方諸佛，無有疲勞。修學一切法門，悉皆通達。廣作福慧，普利塵沙。得六種之神通，圓一生之佛果。然後不捨法界，遍入塵勞。等觀音之慈心，行普

賢之願海。他方此界，逐類隨形。應現色身，演揚妙法。泥犁苦趣，餓鬼道中，或放大光明，或現諸神變，其有見我相，乃至聞我名，皆發菩提心，永出輪迴苦。火鑊冰河之地，變作香林；飲銅食鐵之徒，化生淨土。披毛戴角，負債含怨，盡罷辛酸，咸霑利樂。疾疫世而現為藥草，救療沉疴；饑饉時而化作稻粱，濟諸貧餒。但有利益，無不興崇。次期累世冤親，現存眷屬，出四生之汨沒，捨萬劫之愛纏。等與含生，齊成佛道。虛空有盡，我願無窮。情與無情，同圓種智。

迴向偈

(一編)

願以此功德	莊嚴佛淨土
上報四重恩	下濟三途苦
若有見聞者	悉發菩提心
盡此一報身	同生極樂國

三皈依

(一篇)

自皈依佛，當願眾生，體解大道，發無上心；
自皈依法，當願眾生，深入經藏，智慧如海；自
皈依僧，當願眾生，統理大眾，一切無礙。和南
聖眾。



此咒置經書中可滅誤跨之罪

南无护法韦驮尊天菩萨

